

Jumaat, 4 Disember 2015

### 1. Hospital Sabah rugi RM15.1j PATI gagal bayar bil rawatan

KUALA LUMPUR 3 Dis. - Hospital awam di Sabah rugi sebanyak RM15.1 juta dalam tempoh 2013 hingga Oktober tahun ini berikutan kegagalan pendatang asing tanpa izin (PATI) membayar bil selepas menerima rawatan.

Timbalan Menteri Kesihatan, **Datuk Seri Dr. Hilmi Yahaya** berkata, jumlah tunggakan tersebut dijangka terus meningkat pada masa depan berikutan langkah kerajaan meningkatkan caj rawatan warga asing di hospital kerajaan bermula 2016.

Menurut beliau, kebanyakan PATI yang gagal membuat bayaran memberi alasan tidak mempunyai wang dan tiada waris terdekat untuk membantu, namun atas faktor kemanusiaan rawatan tetap diberikan kepada mereka.

"Jumlah tunggakan kos rawatan yang gagal dibayar pada 2013 adalah RM4.3 juta, 2014 sebanyak RM5.8 juta dan sehingga Oktober 2015 sebanyak RM5 juta.

"Bagi memastikan bil pesakit warga asing ini dikutip, kementerian melalui hospital sentiasa berusaha melaksanakan prosedur operasi standard (SOP) berhubung kutipan hasil," katanya ketika menjawab soalan **Wong Tien Fatt (DAP-Sandakan)** dalam sidang Dewan Rakyat hari ini.

Tien Fatt memohon penjelasan kerajaan mengenai jumlah tunggakan bayaran dan kerugian dialami semua hospital awam di Sabah yang disebabkan oleh PATI.

Menurut Hilmi, bagi pesakit warga asing yang dimasukkan ke dalam wad, pihak hospital akan meminta bayaran deposit terlebih dahulu dan jika bil keseluruhan melebihi jumlah berkenaan, bayaran akan dikutip di dalam wad untuk memastikan mereka membayarnya.

Katanya, jumlah pesakit warga asing yang mendapatkan rawatan di hospital kerajaan dalam tempoh tiga tahun ini adalah sebanyak 319,145 orang bagi 2013 manakala sepanjang 2014 sebanyak 438,201 pesakit dan 321,301 orang pada tahun ini.

Beliau memberitahu, caj kemasukan ke dalam wad bagi warga asing akan dinaikkan bermula tahun depan iaitu RM600 bagi wad kelas ketiga, RM900 untuk kelas kedua dan RM2,100 bagi kelas pertama manakala mereka juga perlu membayar keseluruhan bil wad tanpa subsidi.

"Sekarang mereka cuma membayar RM36 bagi wad kelas ketiga, RM96 untuk kelas kedua dan RM208 bagi kelas pertama manakala caj di dalam wad adalah 30 peratus daripada jumlah keseluruhan," tegasnya.

Jumaat, 4 Disember 2015

## 2. Pusat Akuatik tidak selamat

### Kerosakan pada struktur kekuda bumbung kritikal - Ahmad razif

KUALA TERENGGANU 3 Dis. - Bangunan Pusat Akuatik Majlis Bandaraya Kuala Terengganu (MBKT) yang dikesan mulai berdepan dengan pelbagai kerosakan setahun selepas dibuka pada 2008, disahkan sebagai bangunan tidak lagi selamat digunakan.

Menteri Besar, **Datuk Seri Ahmad Razif Abdul Rahman** memberitahu Dewan Undangan Negeri (DUN), ini berdasarkan pemeriksaan yang dijalankan oleh Bahagian Forensik (Struktur dan Jambatan Jabatan Kerja Raya (JKR) pada November 2014.

"Keadaan struktur pusat berkenaan diklasifikasikan sebagai 'Condition Rating 5' iaitu bangunan tidak selamat untuk digunakan memandangkan keadaan kerosakan yang ditemui pada struktur kekuda bumbung adalah kritikal," ujarnya.

Beliau menyatakan demikian dalam jawapan bertulis kepada soalan **Mohd. Nor Hamzah (Pas-Bukit Payong)** yang bertanyakan status terkini keadaan struktur Pusat Akuatik MBKT.

Sehubungan dengan pengesahan tersebut, Ahmad Razif memberitahu, kerajaan negeri telah mengarahkan MBKT mengambil langkah membuka keseluruhan kekuda struktur bumbung.

"Ketika ini pihak MBKT sedang dalam penyediaan dokumen sebut harga untuk kerja-kerja berkenaan," katanya tanpa menyebut anggaran kos.

Pusat Akuatik MBKT yang dianggarkan menelan kos mencecah hampir RM19 juta, dibina pada 2007 dan dibuka bagi penganjuran Sukan Malaysia (Sukma) 2008 telah menghadapi banyak masalah termasuk air meresap dari kolam ke lantai tingkat bawah kompleks itu.

Malah, bumbung pusat itu juga bocor dan peralatan besi juga berkarat walaupun baru setahun siap dibina sehingga diarah tutup pada Julai 2009 bagi kerja-kerja baik pulih.

JKR ketika itu mendedahkan hasil siasatan awal, terdapat kelemahan pemilihan dan penggunaan bahan binaan serta tiada kerja penyenggaraan yang terancang dan berkesan mengikut Piawaian Prosedur Operasi memburukkan keadaan.

Setelah ditutup selama setahun, difahamkan pusat itu dibuka semula kepada umum buat seketika mulai Februari 2011.

Ogos lalu, Persatuan Renang Amatur Terengganu (PRAT) dilaporkan menghadapi masalah untuk melatih atlet-atlet Sukma berikutan penutupan pusat itu sejak lebih setahun lalu dan terpaksa menggunakan kolam renang Akademi Perikanan Cendering agar latihan tidak terbantut.

Sementara itu, DUN juga diberitahu, sebanyak 90 premis perniagaan dibangunkan di kampung Ladang dan Tanjung di pusat bandar raya ini di tapak yang diambil balik oleh kerajaan negeri.

Dalam jawapan bertulis kepada soalan **Tengku Hassan Tengku Omar (Pas-Ladang)**, Ahmad Razif memaklumkan keutamaan pemilikan diberikan kepada orang Melayu agar mereka tidak terpinggir dalam proses pembangunan bandar raya.



Selasa, 8 Disember 2015

### **3. KTMB dijangka rugi RM55juta tahun ini Kos operasi selenggara serta perkhidmatan semakin meningkat**

KUALA LUMPUR 7 Dis. - Keretapi Tanah Melayu Berhad (KTMB) dijangka mencatatkan kerugian RM55 juta pada tahun ini daripada jumlah kerugian terkumpul RM1 bilion, akibat kos operasi termasuk penyelenggaraan dan perkhidmatan yang kini semakin meningkat.

Sehubungan itu, syarikat tersebut turut menerima subsidi tambahan daripada kerajaan sebanyak lima sen setiap kilometer bagi seorang penumpang untuk menanggung kos keseluruhan operasi dan memastikan kualiti perkhidmatan dapat diberikan kepada rakyat di negara ini.

Presidennya, Sarbini Tijan berkata, pemberian subsidi dan penstrukturkan tambang baharu tersebut dapat menampung sebanyak 40 peratus keseluruhan kos operasi KTMB setiap tahun.

"Bagaimanapun, tambang baharu tersebut hanya melibatkan laluan Lembah Klang sahaja iaitu dari Tanjung Malim ke Sungai Gadut dan Batu Caves ke Pelabuhan Klang.

"Bagi tambang laluan selatan dari Sungai Gadut ke Tampin dan laluan utara dari Kamunting ke Gurun, tiada kenaikan dikenakan kepada penumpang," katanya dalam sidang akhbar khas pelarasan tambang baharu KTMB di sini hari ini.

Yang turut hadir Pengurus Besar KTM Komuter Azshidah Shah Shahari dan Ketua Komunikasi Korporat KTMB, Ridhwan Arshad.

Dalam pada itu, Sarbini berkata, golongan pelajar boleh memohon kad KTMB i-kad pelajar sebelum 7 Januri ini untuk menikmati potongan harga sebanyak 50 peratus.

"Mereka hanya perlu menunjukkan kad tersebut semasa membeli tiket di kaunter. Ia diberikan kepada semua pelajar institusi pengajian tinggi termasuk pelajar luar negara yang menuntut di negara ini. Pelajar sekolah menengah dan rendah yang memakai uniform, mereka turut memperoleh potongan harga tersebut.

"Selain itu, golongan warga emas dan orang kurang upaya (OKU) juga layak mendapat tambang konsesi jika membeli kad di kaunter dengan menunjukkan kad pengenalan dan kad perakuan daripada Jabatan Kebajikan Masyarakat (JKM)," ujarnya.

Sementara itu, menurutnya, pihaknya percaya perkhidmatan komuter turut meningkat dari segi ketetapan masa sebanyak 17 peratus sebelum ini kepada 97 peratus selepas penstrukturkan dilakukan.

"Kita turut menambah koc untuk wanita kerana majoriti penumpang adalah daripada golongan tersebut, di samping perkhidmatan yang disediakan serta bercadang menambah laluan perkhidmatan tren elektrik (ETS) dari Kuala Lumpur ke Butterworth yang dijangka bermula pada Tahun Baru Cina akan datang," katanya.



Selasa, 8 Disember 2015

#### 4. SPRM sahkan jumpa individu derma RM2.6b

Pertemuan berlaku di sebuah negara Asia Barat

KOTA BHARU 7 Dis. - Suruhanjaya Pencegahan Rasuah Malaysia (SPRM) hari ini mendedahkan sekumpulan pegawainya telah bertemu dengan individu yang menyumbang RM2.6 bilion sebagai dana politik kepada Perdana Menteri, Datuk Seri Najib Tun Razak.

Pengarah Bahagian Siasatan SPRM, Datuk Azam Baki ketika mengesahkan perkara itu berkata, pertemuan tersebut berlaku di sebuah negara Asia Barat, baru-baru ini.

Bagaimanapun, katanya, pihaknya tidak boleh mendedahkan butiran pertemuan tersebut kerana perkara itu masih dalam proses siasatan.

"Saya mengesahkan memang ada pegawai SPRM ke Asia Barat baru-baru ini dan berjumpa dengan pihak yang dikatakan berkaitan dengan pemberian dana tersebut (dana RM2.6 bilion)."

"Pada masa ini, perkara mengenai perjumpaan itu tidak boleh didedahkan. Dalam polisi siasatan kita, pihak SPRM tidak boleh dedahkan apa-apa maklumat, siapa individu tersebut, siapa yang terlibat dalam hal ini, kerana ia rahsia siasatan," katanya di sini hari ini.

Sebelum ini, Timbalan Perdana Menteri, Datuk Seri Dr. Ahmad Zahid Hamidi ketika menjawab isu tersebut di Dewan Rakyat memaklumkan bahawa SPRM telah mengenal pasti individu yang menyumbang dana tersebut.

Beliau yang tampil mewakili kerajaan bagi menjawab buat kali pertama isu tersebut berkata, Bank Negara Malaysia (BNM) juga telah dimaklumkan mengenai pembukaan akaun bank untuk menyimpan keseluruhan dana itu.

Malah, kata Ahmad Zahid, SPRM pada 4 Ogos lalu juga sudah menjelaskan wang RM2.6 bilion yang dimasukkan ke akaun Perdana Menteri itu bukan daripada 1Malaysia Development Berhad (1MDB)

Dalam pada itu, Azam memberitahu, hasil keseluruhan siasatan tersebut nanti akan dikemukakan kepada peguam negara.

"Keseluruhan hasil siasatan nanti akan diserahkan kepada Peguam Negara, terpulanglah kepada Peguam Negara untuk mendedahkan kepada umum atau sebaliknya," katanya.

Sementara itu, Azam berkata, Perdana Menteri telah memberi kerjasama yang baik ketika memberi penerangan berhubung isu SRC International Sdn. Bhd. dan dana RM2.6 bilion.

"Kita akan memaklumkan perkembangan susulan dari semasa ke semasa," katanya.



Selasa, 8 Disember 2015

## 5. Industri biomas: Sasar RM25 bilion pelaburan menjelang 2020

KUALA LUMPUR 8 Dis. - Kerajaan menyasarkan sebanyak RM25 bilion pelaburan dalam industri biomas di negara ini menjelang 2020.

Menteri Perdagangan Antarabangsa dan Industri, Datuk Seri Mustapa Mohamed berkata, sektor tersebut juga dijangka membantu Malaysia menjana tambahan RM30 bilion kepada pendapatan kasar negara selain menyediakan 66,000 peluang pekerjaan dan mengurangkan pelepasan karbon sebanyak 12 peratus dalam tempoh berkenaan.

Katanya, komitmen kerajaan untuk membangunkan industri biomas yang berpotensi besar, boleh dimanfaatkan untuk masa depan.

"Kita telah memperakui industri biomas sebagai salah satu bidang ekonomi utama bagi menjana kekayaan baharu untuk negara selepas tahun 2020.

"Kita tidak hanya menggalakkan pelaburan ke bidang ini melalui Lembaga Pembangunan Pelaburan Malaysia (MIDA) tetapi membangunkan seluruh rantaian nilai yang merangkumi pasaran eksport dan kegunaan akhir dengan Perbadanan Pembangunan Perdagangan Luar Malaysia (Matrade)," katanya.

Beliau berkata demikian pada Persidangan Antarabangsa Biomas Malaysia (IBCM) 2015 di sini, hari ini. - UTUSAN ONLINE

Khamis, 10 Disember 2015

#### **6. Polis negeri terima 74 kenderaan peronda baharu**

SEREMBAN 9 Dis. - Penerimaan 74 kenderaan peronda baharu hari ini diharap dapat meningkatkan lagi kecekapan dan kelincinan operasi pasukan polis di negeri ini.

Ketua Polis negeri, **Datuk Jaafar Mohd. Yusof** berkata, kesemua kenderaan tersebut iaitu 54 buah kereta peronda Proton Inspira dan 20 motosikal Unit Ronda Bermotosikal (URB) akan segera diagihkan kepada Ibu Pejabat Polis daerah.

"Kita juga berharap 'respond time' ke tempat kejadian selepas ini dapat dipercepatkan daripada 15 minit kepada 10 minit," katanya.

Beliau berkata demikian kepada pemberita selepas Majlis Penyerahan Kenderaan Peronda Proton Inspira dan URB di padang kawad Ibu Pejabat Kontinjen (IPK) negeri di sini.

Menurut Jaafar, pihaknya juga akan meneliti beberapa aset yang sudah uzur untuk diganti.

Khamis, 10 Disember 2015

#### **7. Pelan rasionalisasi 1MDB dalam proses penyelesaian - PM**

KUALA LUMPUR 10 Dis. - Perdana Menteri, Datuk Seri Najib Tun Razak yakin pelan rasionalisasi 1Malaysia Development Bhd (1MDB) berjalan dengan baik dan dalam proses penyelesaian.

Sebagai bukti, Presiden UMNO itu berkata penjualan syarikat Edra Global Energy Bhd telah berjaya mengurangkan hutang 1MDB sebanyak RM17 bilion.

"Ini membuktikan pelan rasionalisasi 1MDB sedang berjalan dengan baik," kata Najib yang juga Menteri Kewangan dalam ucapan ketika merasmikan Perhimpunan Agung UMNO 2015 di Pusat Dagangan Dunia Putra (PWTC), di sini hari ini.

Dalam ucapan beliau yang bertajuk 'UMNO: Menyempurnakan Sebuah Perjuangan', Najib berkata, beberapa pengumuman lain akan menyusul, yang sekali gus akan menyakinkan rakyat mengenai kesungguhan kerajaan dalam memastikan pelan rasionalisasi syarikat itu berjalan lancar.

Pada 23 Nov, 1MDB, Edra dan anak syarikatnya memeterai perjanjian jual beli saham dengan CGN Group, yang membentuk konsortium dengan syarikat Qatar Nebras Power; untuk menjual 100 peratus pemilikan dalam semua aset tenaganya.

Aset-aset tenaga yang terlibat ialah Edra Solar Sdn. Bhd., Edra Energy Sdn. Bhd., Powertek Energy Sdn. Bhd., Jimah Teknik Sdn. Bhd., Jimah O (amp) M Sdn. Bhd., Mastika Lagenda Sdn. Bhd. dan Tiara Tanah Sdn. Bhd. (syarikat operasi Edra).

CGN Group akan membayar dalam tunai, nilai ekuiti RM9.83 bilion dan akan menanggung semua hutang kasar berkaitan dan tunai syarikat operasi Edra berjumlah hampir RM8 bilion, berdasarkan tarikh penilaian pada 31 Mac 2015.

Transaksi berkenaan dijangka selesai pada Februari depan.

Selain penjualan ekuiti dalam syarikat tenaga Edra, pelan rasionalisasi 1MDB termasuk pelaksanaan pertukaran hutang dengan ekuiti, dengan syarikat pelaburan petroleum dari Abu Dhabi, International Petroleum Investment Company (IPIC) yang akan mengurangkan hutang 1MDB sebanyak kira-kira RM16 bilion.

Selain itu, 1MDB turut mengemukakan pelan penjualan ekuitinya di Bandar Malaysia bernilai kira-kira RM11 bilion.

Sementara itu, Perdana Menteri turut mengulangi kenyataan bahawa dana RM2.6 bilion yang diperolehnya merupakan wang derma dari luar negara dan bukannya diambil daripada 1MDB.

"Saya juga telah menjelaskan dengan terperinci kepada para perwakilan semasa taklimat Presiden (Selasa).

"Yang mustahak saya yakin, saya berada di pihak yang benar, dan kebenaran akan terbukti juga," kata Najib. - BERNAMA



Isnin, 14 Disember 2015

#### **8. Penjawat awam perlu terap budaya 'Cari dan Bantu'**

KUALA SELANGOR 13 Dis. - Penjawat awam perlu menerapkan budaya 'Cari dan Bantu' bagi memastikan perkhidmatan awam yang ditawarkan kerajaan sampai kepada golongan sasaran.

Ketua Setiausaha Negara, Tan Sri Dr. Ali Hamsa berkata, ini penting kerana terdapat kekangan tertentu yang dihadapi rakyat sehingga menyebabkan penerima tercicir daripada bantuan tersebut.

"Contohnya, bantuan yang sepatutnya disampaikan kepada orang miskin dan orang kurang upaya (OKU) tidak sampai kerana mereka tidak mempunyai pengangkutan untuk ke pejabat kerajaan atau cara untuk memohon.

"Bagi menangani kekangan ini, mulai tahun depan, saya minta semua jabatan kerajaan dan pegawai kerajaan gunakan konsep 'Cari dan Bantu' untuk melancarkan proses perkhidmatan awam ini," katanya selepas menyempurnakan Majlis Pecah Tanah Dewan Serbaguna Sekolah Menengah Kebangsaan Raja Muda Musa di Bestari Jaya di sini, hari ini.

Yang turut hadir ialah Pemegang Amanah Yayasan Rafulin, Datuk Mohd. Razali Othman dan Pengarah Pendidikan Selangor, Zainuren Mohd. Nor.

Yayasan Rafulin dan Alumni Kohort 82-86 Sekolah Menengah Batang Berjuntai memberi sumbangan RM3 juta bagi kos pembinaan dewan serbaguna itu yang dijangka siap pada 2017.

Persatuan Suri dan Anggota Wanita Perkhidmatan Awam (Puspanita) turut menyerahkan bantuan kewangan bernilai RM57,800 kepada lima pelajar OKU, 73 pelajar miskin dan empat buah rumah kebajikan di sekitar daerah berkenaan.



Jumaat, 18 Disember 2015

#### **9. Tiada draf laporan 1MDB disiapkan setakat ini, kata Audit Negara**

KUALA LUMPUR 18 Dis. - Ketua Audit Negara berkata, tiada draf laporan yang telah disiapkan setakat ini kerana pengauditan terhadap 1Malaysia Development Bhd (1MDB) masih lagi dijalankan.

Jabatan Audit Negara mengeluarkan satu kenyataan hari ini untuk menjelaskan kedudukan terkini berikutan satu artikel oleh The Wall Street Journal yang mengaitkan dakwaan terhadap 1MDB dengan draf laporan pengauditan.

"Jabatan telah dimaklumkan oleh Jawatankuasa Kira-Kira Wang Negara (PAC) dalam mesyuarat pada hari ini bahawa Laporan Akhir Pengauditan 1MDB oleh jabatan telah dijadualkan untuk dibentangkan kepada PAC pada bulan Februari 2016," katanya.

Jabatan tersebut juga akan memastikan laporan akhir itu dapat disiapkan mengikut jadual. - BERNAMA

Jumaat, 18 Disember 2015

## 10. RM5.6 juta kompaun dikeluarkan - Adnan

Pemandu lori bawa muatan bauksit didenda

KUANTAN 17 Nov. - Sebanyak RM5.6 juta kompaun dikeluarkan ke atas pemandu lori membawa muatan bauksit di negeri ini atas pelbagai kesalahan jalan raya sejak operasi perlombongan bahan mineral itu dijalankan sehingga kini.

Menteri Besar, Datuk Seri Adnan Yaakob berkata, dalam tempoh sama, sebanyak 104,537 lori yang membawa muatan bahan mineral itu diperiksa oleh pelbagai agensi penguatkuasaan.

"Jumlah lori yang disita dan dikompaun pula adalah 5,023 buah. Sebanyak 20 jengkaut turut disita dalam operasi ini.

"Pemeriksaan ini melibatkan beberapa agensi antara seperti Jabatan Pengangkutan Jalan (JPJ), Pejabat Tanah dan Galian (PTG) serta Suruhanjaya Pengangkutan Awam Darat (SPAD)," katanya pada sidang Dewan Undangan Negeri (DUN) hari ini.

Beliau menjawab soalan tambahan **Tengku Zulpuri Shah Raja Puji (DAP-Mentakkab)** yang bertanyakan apakah kerajaan negeri ingin menggunakan kaedah moden bagi mengesan lori-lori tidak daftarkan dalam kegiatan tersebut.

Adnan berkata, daripada jumlah tersebut, PTG telah menyita sebanyak 213 buah lori dengan tawaran kompaun sebanyak RM4.2 juta manakala jumlah saman ditawarkan JPJ pula RM963,000.

Tambah beliau, sebanyak 628 buah lori dikompaun oleh SPAD dengan jumlah saman yang dibayar adalah sebanyak RM34,500.

"Majlis Perbandaran Kuantan (MPK) turut mengenakan kompaun kepada 577 buah lori membawa bauksit dengan jumlah yang dikenakan RM288,000," katanya.

Sementara itu, ketika menjawab soalan **Datuk Dr. Ahmad Shukri Ismail (BN-Pulau Tawar)** berhubung kegiatan bijih besi di negeri ini, beliau berkata, hanya lima syarikat masih mengeluarkan bahan itu manakala syarikat yang tidak aktif adalah sebanyak 139 buah.

"Pada dasarnya aktiviti sektor lain juga turut menyumbang kepada pencemaran air sungai seperti perladangan dan pembangunan. Bagaimanapun, aktiviti perlombongan bijih besi ini sentiasa dipantau oleh Jabatan Mineral dan Geosains serta PTG negeri," katanya.

Sabtu, 19 Disember 2015

### **11. PAC puas hati penjelasan Arul Kanda**

KUALA LUMPUR 18 Dis. - Jawatankuasa Kira-Kira Wang Negara (PAC) berpuas hati dengan penjelasan Presiden dan Pengarah Eksekutif Kumpulan 1Malaysia Development Bhd (1MDB), Arul Kanda Kandasamy mengenai 1MDB pada prosiding yang diadakan di Parlimen hari ini.

Pengerusinya, Datuk Hasan Arifin berkata, dalam prosiding yang berlangsung kira-kira tiga jam itu, Arul Kanda telah menerangkan pelan rasionalisasi 1MDB.

"PAC telah selesai mengadakan prosiding pengurusan kawalan tadbir urus 1MDB membabitkan Arul Kanda hari ini dan saya berpuas hati atas penjelasan beliau," katanya dalam satu kenyataan di sini hari ini.

Hari ini, PAC meneruskan prosiding buat kali kedua terhadap Arul Kanda di bangunan Parlimen bermula pada pukul 9 pagi ini.

Bagaimanapun, media tidak dibenarkan memasuki kawasan Parlimen untuk membuat liputan prosiding tersebut.

Arul Kanda telah dipanggil untuk memberi keterangan kepada PAC mengenai isu 1MDB pada 1 Disember lalu.

Dalam pada itu, Hasan berkata, PAC akan meneruskan prosiding pengurusan kawalan tadbir urus 1MDB dengan memanggil Pengerusi 1MDB, Tan Sri Lodin Wok Kamaruddin pada 19 Januari ini untuk memberi keterangan.

"PAC juga akan memanggil bekas Pengerusi Lembaga Pengarah syarikat berkenaan, Tan Sri Mohd. Bakke Salleh pada 20 Januari 2016.

"Jika ada keperluan bagi melengkapkan siasatan, PAC juga akan memanggil semula bekas Ketua Pegawai Eksekutif 1MDB, Datuk Shahrol Azral Ibrahim Halmi," katanya.

Menurut beliau, PAC memberi masa kepada Jabatan Audit Negara untuk melengkapkan Laporan Audit Akhir 1MDB yang dijangka dibentangkan selewat-lewatnya pada akhir Februari 2016.

Isnin, 28 Disember 2015

## 12. Bauksit : Keupayaan PTG terbatas

KEMAMAN 28 Dis. - Pejabat Pengarah Tanah dan Galian (PTG) negeri tidak menempatkan pegawai penguat kuasa secara statik di sekitar kawasan bauksit yang terdedah kepada kecurian di daerah ini sepanjang masa kerana bimbangkan keselamatan mereka.

Timbalan Pengaruhnya, Johan Ibrahim berkata, pada masa yang sama pihaknya dengan kekuatan cuma 30 anggota yang ternyata terbatas dalam memantau keseluruhan kegiatan memindahkan bahan itu daripada kawasan seluas 3,974 hektar itu.

"Kita tak boleh letakkan penguat kuasa secara statik dan untuk menjalankan penguatkuasaan pada waktu malam. Kita tiada senjata api, bimbang kemungkinan perkara yang buruk berlaku terhadap mereka," ujarnya.

Beliau menyatakan demikian ketika menyampaikan taklimat mengenai keadaan semasa kepada Menteri Besar, Datuk Seri Ahmad Razif Abdul Rahman yang meninjau masalah penduduk ekoran berdepan dengan masalah pencemaran dan kerosakan jalan yang terukk ekoran penemaptan mereka menjadi laluan pemindahan bauksit.

Menurut beliau, PTG tidak pernah meluluskan sebarang permohonan oleh banyak syarikat untuk melakukan kerja-kerja pengalihan bauksit dari daerah ini, di sekitar kawasan sekitar Neram, Jabor dan Perasing yang mengandungi bijih, aliran dari Bukit Goh, Kuantan.

"Kita melihat tauke-tauke bauksit ini tetap berdegil dan tidak mengendahkan pihak penguat kuasa di samping tonto-tonto berkeliaran memberi maklumat, mengekor pihak berkuasa.

"Bila kita sampai ke tempat kecurian, mereka lari ke ladang-ladang dan tanah milik. Kita tak boleh tahan kenderaan di tanah milikan (mengikut undang-undang tanah), kecuali di tanah kerajaan," ujarnya.

Katanya, setakat ini hanya mengeluarkan empat saman amaran kepada pihak yang mencuri bauksit di daerah ini terutama di Perasing kerana mereka belum sempat mlarikan keluar bahan itu.

Menyentuh mengenai lari-lori dari Kuantan yang menggunakan laluan pintas melalui jalan negeri ini, beliau berkata, walaupun menyebabkan kerosakan teruk jalan dan pencemaran yang dahsyat, pengusaha menggunakan permit sah dan jalan persekutuan.

Sehubungan itu pihaknya antara lain sedang mengusahakan kertas dasar untuk kelulusan kerajaan negeri bagi menghalang kegiatan itu, agar mereka kembali menggunakan laluan asal.

"Mesyuarat Jawatankuasa Teknikal Penguatkuasaan PTG dalam mesyuarat baru-baru ini turut mencadangkan Jabatan Kerja Raya (JKR) negeri mengambil deposit yang tinggi daripada syarikat yang melalui Neram.

"Di samping itu kita mencadangkan diberi kuota laluan untuk masuk dan waktu yang dibenarkan me-lalui bagi jalan berkenaan," ujarnya.



Isnin, 1 Januari 2015

### 13. Pelan Rasionalisasi 1MDB berjaya

KUALA LUMPUR 31 Dis. - Janji yang dibuat oleh Perdana Menteri, Datuk Seri Najib Tun Razak untuk menjayakan Pelan Rasionalisasi 1Malaysia Development Berhad (1MDB) selama enam bulan, tercapai hari ini hasil penjualan 60 peratus kepentingan Bandar Malaysia kepada konsortium IWH-CREC Sdn. Bhd. (IWH-CREC).

Presiden dan Pengarah Eksekutif Kumpulan 1MDB, Arul Kanda berkata, berdasarkan pengumuman Pelan Rasionalisasi 1MDB pada Jun 2015 dan janji oleh Najib selepas itu, tiga transaksi telah dilakukan oleh syarikat pelaburan strategik kerajaan tersebut membabitkan nilai sehingga RM40 bilion.

Jelas beliau, selain jualan 60 peratus kepentingan Bandar Malaysia kepada IWH-CREC dengan bayaran RM7.41 bilion, dua transaksi lain ialah pertukaran hutang kepada asset bersama International Petroleum Investment Company (IPIC) bernilai RM16 bilion dan jualan Edra Global Energy Bhd. (Edra), kepada China General Nuclear Power Corporation (CGN Group) bernilai RM17 bilion termasuk beban hutang.

"Pada hari terakhir tahun 2015 dan hari terakhir tempoh enam bulan pemulihan 1MDB yang dijanjikan Perdana Menteri, kita hari ini berjaya menyelesaikannya. Di bawah pelan pemulihan ini, terdapat tiga komponen untuk meraih pulangan melalui transaksi dengan IPIC, penjualan kepentingan Edra dan Bandar Malaysia," katanya.

Beliau berkata demikian kepada pemberita selepas majlis memeterai Perjanjian Jual Beli Saham antara 1MDB dan IWH-CREC yang disaksikan oleh Menteri Kewangan II, Datuk Seri Ahmad Husni Hanadzlah, di sini hari ini.

Turut hadir ialah Timbalan Menteri Kewangan, Datuk Johari Abdul Ghani; Pengerusi Lembaga Pengarah 1MDB, Tan Sri Lodin Wok Kamaruddin; Naib Pengerusi Eksekutif Kumpulan Iskandar Waterfront Holdings (IWH), Tan Sri Lim Kang Hoo; Duta Besar China ke Malaysia, Huang Huikang dan Pengarah Urusan China Railway Engineering Corporation (M) Sdn. Bhd. (CREC), Cai Zemin.

Bandar Malaysia seluas 194 hektar terletak di Sungai Besi, Kuala Lumpur yang ketika ini merupakan pangkalan Tentera Udara Diraja Malaysia (TUDM).

Tambah Arul, transaksi penjualan kepentingan Bandar Malaysia itu dijangka dimuktamadkan pada akhir Jun 2016. Bagaimanapun kata beliau lagi, 1MDB dan IWH-CREC masih tertakluk kepada pematuhan untuk membina semula lapan fasiliti ketenteraan dan polis di pelbagai lokasi sebagai gantian terhadap pembangunan Bandar Malaysia.

"Kita telah memilih rakan kerjasama yang baik (IWH-CREC). IWH sendiri mempunyai pengalaman dalam membangunkan Iskandar Malaysia di Johor sementara CREC mempunyai teknologi dan status yang baik di peringkat antarabangsa.

"Paling penting ketika membuat pembidaan, IWH-CREC bersetuju untuk mengikut syarat-syarat yang telah ditetapkan termasuk memberi peluang kepada syarikat tempatan dan syarikat-syarikat milik kerajaan (GLC) untuk terlibat sama dalam pembangunan Bandar Malaysia serta meneruskan hasrat pembinaan rumah mampu milik di dalam projek ini," katanya.

Dalam pada itu, Arul berkata, kenyataan bahawa Bandar Malaysia kini dimiliki firma asing adalah tidak betul kerana berdasarkan peratusan pemilikan CREC di dalam konsortium IWH-CREC hanya 40 peratus, sekali gus menjadikan pemilikan efektif syarikat China itu dalam Bandar Malaysia hanya 24 peratus, manakala 76 peratus lagi masih dimiliki entiti tempatan.